

# Dithero tsa Tirelano mo Kutlwanong

58/2015 Thero ka Sontaga wa wa bofelo morago ga moletlo wa Borarobongwe, e le ka 22. 11. 2015

## Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke ene, le kwadilwe mo go Luka 12:35, le re: **“A matheka a lona a nne a tlamilwe, le dipone tsa lona di tuke.”**

1. Sefela sa 332 - 307/315
2. **Thapelo:** Morena Jesu Keresete, Mogolodi wa rona, busa dipelo le megopolo ya rona ka Mowa o o Boitshepo wa gago gore re nne re gakologelwe ka gale bokhutlo jwa lefatshe le katlholo ya gago ka letsatsi la go bowa ga gago. O re baakanye, o re siamise ka fa loratong lwa gago, gore re go sale morago ka boikanyego mo botshelong jono gore re tle re nne le wena le mo kgalalelong ya botshelo jo bo tlang. Amen.
3. Lefoko la Testamente e kgologolo le kwadilwe mo go Jesaya 65:17-25;  
Epistolo ka fa thulaganyong ya 2 e kwadilwe mo go Tshenolo 21:1-7;  
Efangele ka fa thulaganyong ya 3 e kwadilwe mo go Luka 12:42-48.
4. A go ipolelwe tumelo ya bokeresete!
5. Sefela sa 330 - 305/313
6. Thapelo ya mmadi wa thero.
7. **Efangele** ka fa thulaganyong ya 1 e kwadilwe mo go Matheo 25:1-13, e re: "'Motlhang oo puso ya magodimo e tla tshwana le makgarebe a a some, a a tsereng dipone tsa ona, a bolola, a ya go kgatlhantsha monyadi. A matlhano a ona a ne a le bosilo, a matlhano a le botlhale. A a bosilo, e rile a tsaya dipone tsa ona, a se ka a tsaya le lookwane. A a botlhale ona a tsaya lookwane ka medutwana mmogo le dipone tsa ona. Ya re monyadi a diega, otlhe a otsela, a robala. Mo gare ga bosigo ga opiwa mokgosi ga twe: 'Bonang, monyadi ke yo! Tswaang lo ye go mo kgatlhantsha!' Ke fa makgarebe ao a tsoga otlhe, a baakanya dipone tsa ona, mme a a bosilo a raya a a botlhale a re: 'Re tsheleng lookwane lo longwe lwa lona, gonne dipone tsa rona di a tima.' A a botlhale a araba a re: 'Nyaya, ga go ka ke ga lekana rona le lona; bogolo yaang go ba ba rekisang, lo ithekele.' Ya re a sa ile go reka, monyadi a tla; mme a a iketleeditseng a tsena nae mo moletlong wa nyalo, mme mojako wa tswalwa. Morago makgarebe a mangwe le ona a tla a re: 'Morena, Morena, re bulele!' Ene a araba a re: 'Ammaaruri ke lo raya ke re: Ga ke lo itse' Ka moo he, itiseng! Gonne ga lo itse letsatsi, le fa e le nako e Morwa-Motho a tla tlang ka yona.'" Amen.
8. **Thero:** Ditsala tsa me mo Moreneng wa rona Jesu Keresete, re a tle re ipolele ka Sontaga le Sontaga, fa re dumela gore Jesu Keresete, Morena wa rona, o tla bowa a tla go atlhola batshedi le baswi. Re a itse gore mo Testamenteng e ntšhwa mafoko a mantsi a re kaela gore letsatsi le legolo la go kopana le Mogolodi wa rona ka sebele le tla tla. Ke gore tumelo e e tshepang Keresete e leba isagwe, e seng isagwe ya letsatsi la kamoso fela, gongwe ya beke e tleng, gongwe ya ngwaga o o tlang. E leba kwa go se se tlang morago ga

botshelo jono. Tebo ya yona ke kgalalelo e e sa feleng le botshelo jo bo sa khutleng kwa legodimong, fa Morena wa rona a setseng a ileng teng. Mme jaaka re le batho re imelwa ke ditiro le matsapa a botshelo jono , gongwe dipelo le mewa ya rona di gapiwa ke maipelo le menate ya jona. Di re lebatsa, fa letsatsi la bofelo le setse le atametse. Mme Keresete o a re tlhagisa. A re: Itiseng, gonne ga lo itse letsatsi, le fa e le nako e Morwa-Motho a tla tlang ka yona. Fa re batla go tsaya tlhagiso ena ya gagwe tsia tota, a re se ka ra lebala ka go itsietsa ka gore ka gongwe re ka kopana le ene letsatsi la bofelo le ise le tlhaba, e bong mo nakong ya loso lwa rona. Le nako e, ga re itse gore e tla tla leng. Ka moo a re ithuteng ka setshwantsho se sa magarebe a a lesome gore re itise jang.

1. A tota ke mosola go tlhokomela tlhagiso eo ya ga Jesu e e reng: Re itise, re ipaakanyetse go ka mo kgatlhantsha ka nako e nngwe le nngwe? Ga re ka ke ra tlhoka karabo, fa re leba gore Morena o batla go re isa kae ka mafoko a gagwe a setshantsho sa makgarebe a lesome. Ke thato ya gagwe gore re nne le ene ka bosakhutleng. O tshwantsha kgalalelo ya botshelo jo bo sa khutleng kwa legodimong le moletlo wa nyalo. Fa re gopola lenyalo, re gopola boitumelo le boipelo le monate. Mo lenyalong go na le dijo le dino tse di monate ka botlalo tse motho a sa di kgoneng ka letsatsi le letsatsi. Mo lenjalong mathata le matshwenyego a lebetswe, ga go na sepe mo dipelong tsa batlamoletlong, fa e se boitumelo fela. Ka go dirisa setshwantsho sa lenyalo, Morena Jesu o ne a rata go re thusa gore re tle re kgone go itlhome go le gonnye se re tla se bonang motlhanga re tla kopanang le ene mo kgalalelong. Fela ga go na mafoko ape mo lefatsheng lotlhe a a nonofileng go ka tlhalosa mo go feleletseng bontle jwa botshelo jo bo sa khutleng. Moapostolo Paulo o a re ruta, fa yona kagiso e e tswang mo Modimong e e fiwang modumedi, e gaisa tlhaloganyo ya motho. Go ntse fela jalo le mabapi le kgalalelo ya legodimo. E gaisa tlhaloganyo ya rona. A go lekane, fa re itse gore menate yotlhe le maitumelo otlhe a ka bonwang mo lefatsheng ka bophara ga se a sepe, fa a bapisiwa le kgalalelo e re tla e senolelwang.

2. Moletlo oo wa nyalo, o Jesu a buang ka ga ona, o setse o baakantswe. Morena wa rona ka esi o dirile tsotlhe ka dipogo le loso le tsogo ya gagwe gore re tle re dumelelwe go ka tsena moletlo oo. O batla se le sengwe fela mo badumeding ba gagwe gore ba nne ba ba ipaakantseng go ka mo kgatlhantsha ka nako efe kgotsa efe. Ga a ka itsise ope gore o tla bowa leng kwa legodimong. Nnete ke gore o buile gantsi ka ditiragalo tse di boitshegang tse di tshwanetseng go direga pele letsatsi la bofelo le ise le tlhage. Mme le fa re ka tsaya gore tse dingwe tsa tsona di setse di dirafetse, ga re na go leka o ipatlalela nako ya kgorogo ya Monyadi. Ditemana tsa lefoko la thero ya gompiano di a re kaela gore o tla tla ka tshoganyetso, ka nako e a sa letiweng ke ope ka yona. Go sego bone ba o tla ba fitlhelang ba disitse, jaaka makgarebe ao a a botlhale. Ona a sego ka ntlha ya gore dipone tsa ona di tla tuka, fa monyadi a tla.

A re ipotsiseng gore a rona re tshwana le makgarebe a a botlhale? A lobone lwa tumelo ya rona bo itshupa, jaaka lesedi le le phatsimang mo botshelong jotlhe jwa rona? A re tshotse ka metlha lookwane la lefoko la Beibele le disakaramente le thapelo? Ke tsona tse di tukisang, le go tshedisa tumelo? A kampo le batlile go

tima mo go rona, jaaka totšhe e e feleletsweng beteri? Ditsala, le fa re ka araba, re re: Ee, re na le tumelo, re tshwanetse go ela tlhoko lefoko la Modimo le le re kaelang gore le mokeresete o sa ntse a le bokoa. Le ene yo o ineetseng Morena Jesu o sa ntse a le moleofi, o ka raelwa ke Satane, o ka faposiwa ke ene mmaba yo o bosula mo tseleng ya tshiamo. Yo o dumelang ruri, bogolo segolo ene o na le kitso gore ga a ka ke a kgona go nnela ruri mo tumelong e e tshelang, a sa tshelwe kgapetsakgapetsa lookwane lo lo fepang tumelo, e bong ka go utlwa lefoko la Modimo le go amogela boitshwarelo jwa dibe mo disakamenteng, le go kopana le Rraetsho wa legodimo mo thapelong. Go dirisa tseo ke gore go itsisa le go ipaakanyetsa go bowa ga Morena sentle.

3. Setshwantsho sa makgarebe a a lesome se a re ruta gore go tla ga Morena ka nako ya katlholo. E tla re fa a bowa a tla, a tlhaola ba ba jang moletlo wa nyalo mo go ba ba latlhelwang kwa ntle. Ga se makgarebe otlhe a ikaeletseng go kgatlhantsha Monyadi, a a amogelwang ke ene. One a a sa ithekelang lookwane, fa nako e ntse e le teng, a iphitlhela a latlhegile. Ba leka go bona se se ka tukisang dipone, mme nako ya go di baakanya e setse e ile. Morago ba ikuela mo Monyading, ba lela ba re: Morena, Morena, re bulele! Mme ene o tla ba araba ka mafoko a a botlhoko, a re: Ammaaruri, ke lo raya, ke re: Ga ke lo itse. Ke gore Jesu Keresete ga a batle gore re itsietse jaaka makgarebe a a bosilo ao. Ka nako ya go bowa ga gagwe, e ka nna ka letsatsi la bofelo la lefatshe, gongwe ka letsatsi la loso lwa rona, go tla bo go sena nako ya go tllhabologa, le go sokologa, le go baakanya dilo tse di sa siamang mo botshelong jwa rona. Ka nako eo re tla sekisiwa, le go atlholwa ke ene. Ba ba ipaakantseng sentle ka fa go rateng ga Modimo ba tla atlholelwa go tshela le Morena ka go sa felang. Ba bangwe ba tla fitlhela mojako wa kgalalelo ya legodimo o tswetswe ba ntse ba ile go reka lookwane. Le go lela le go kopa boutlwelobotlhoko ga go kitla go ba thusa sepe. Boutlwelobotlhoko jwa Morena le boitshwarelo le lorato lwa gagwe di ka bonwa ke mongwe le mongwe, fa a sa ntse a tshela mo lefatsheng le le ka kwano. Ka moo, a re amogeleng molaetsa wa setshwantsho sena sa ga Jesu, fa e le tlhagiso le taletso. O a re tlhagisa gore r ipaakanyetse go bowa ga gagwe. O a re laletsa gore re tshole, le go dirisa dineo tsa gagwe tse di ka re kgonisang go ema fa pele ga gagwe ka letsatsi la katlholo, re le basiami ka go balelwa tshiamo ya gagwe ka go dumela mo go ene, gonne ke keletso e kgolo ya gagwe gore re se ka ra latlhega, mme re nne le ene ka bosakhutleng mo pusong ya gagwe. Amen.

9. **Thapelo:** Re rute go bala malatsi a rona gore re tle re tlhalefe mo dipelong ka go gakologelwa kaelo le tsholofetso tse di reng: “Lo se tsholele bopelotlhomogi jwa Modimo lefela; gonne o a re: ‘Ke go utlwile ka nako ya go ka amogelwa, ke go thusitse ka letsatsi la pholoso.’ Bonang he, jaanong ke nako ya go ka amogelwa sentle; bonang, jaanong ke letsatsi la pholoso!” Amen. Thapelo ya Morena: Rara wa rona yo o mo legodimong ...

10. Sefela sa 331 - 306/314

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke G. Heidenreich, ka ngwaga wa 1985.  
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.